



天
地
人
文
大
學
藏
書

書
山
藏
書
子
文
卷

進晏子春秋表

護左都水使者光祿大夫臣向言所校中

書晏子十一篇臣向謹與長社尉臣參校

讐太史書五篇臣向為一篇參書十三篇

凡中外書三十篇為八百三十八章除復

重二十二篇六百三十八章定著四篇二



百一十五章外書無有三十六章中書無
有七十一章中外皆有以相定中書以天
為芳又為備先為牛章為長如此類者考
謹頗略榆皆已定以殺青書可繕寫晏子
名嬰謚平仲萊人萊者今東萊地也晏子
博聞強記通於古今事齊靈公莊公景公

以節儉力行盡忠極諫道齊國君得以正
行百姓得以附親不用則退耕於野用則
必不誣義不可脅以邪白刃雖交胸終不
受崔杼之劫諫齊君懸而至順而刻及使
諸侯莫能誣其辭其博通如此蓋次管仲
內能親親外能厚賢居相國之位次萬鍾

之祿故親或待其祿而衣食五百餘家處
士待而舉火者亦甚衆晏子衣苴布之衣
麋廩之裘駕弊車疲馬盡以祿給親戚朋
友齊人以此重之其書四卷皆忠諫其君
文章可觀義理可法皆合六經之義又有
復重文辭頗異亦不敢遺失又有頗不合

經術似非晏子之言疑後世辨士所為者
故亦不敢失斯書也可常置旁御觀謹第
錄臣向昧死上

聞

萬曆十六年冬月之吉後學吳懷保校梓

晏子春秋卷之一目錄

內篇

莊公

諫矜勇不顧行義

景公

諫願諧大夫無為禮

諫病酒

諫不納弦章之言


諫不卹天災

諫夜聽新樂

諫燕賞無功

諫信用讒佞

諫愛嬖妾



諫失言

諫廢適

諫誅祝史

諫怒封人之祝

諫使楚巫明德

諫祠靈山河伯

諫貪有國之樂

諫悲牛山

諫遊公阜過言

諫不恤死齒

諫衣狐白裘

諫異熒惑守虛

諫伐宋

諫畋荒

諫誅野人

諫誅圉人

諫籍重獄多

諫殺犯槐

諫囚斬竹

諫殺搏治之兵

諫起大臺之役

諫為長廩

諫為鄒之長塗

諫游獵興役

諫坐地

諫以蛇虎為不祥

諫又為鐘

諫以泰呂為燕饗

諫飾履以金玉

諫以居服致諸侯

諫矜冠裳游處之貴

諫巨冠長衣以聽朝

諫朝居嚴

諫登路寢臺

諫望國而歎

諫禁逢何合葬

諫不歛嬰子

諫厚莖梁丘據

諫以人禮莖狗

諫養勇士

諫思勇力士

晏子春秋卷之一

內篇

諫

選才殿

莊公

。諫矜勇不顧行義

莊公奮乎勇力、不顧于行義、勇力之士無忌于國、貴賤不薦善、逼邇不引過、故晏子見公公曰、古者亦有徒以勇力立于世者乎、晏子對曰、嬰聞之、輕死以行禮、謂之勇、誅暴不避疆、謂之力、故勇力之立也、以行其禮義也、湯武用兵而不為逆、并國而不為會、仁義之



理也。誅暴不避彊，替罪不避衆。勇力之行也。古之為
勇力者，行禮義也。今上無仁義之理，下無替罪誅暴
之行，而徒以勇力立于世，則諸侯行之以國危，匹夫
行之以家賤。昔夏之衰也，有推侈大戲殷之衰也，有
費仲惡來，足走千里，手裂兕虎，任之以力，凌轢天下，
威戮無罪，崇尚勇力，不顧義理，是以桀紂以滅，殷夏
以衰。今公自奮乎勇力，不顧乎行義，勇力之士無忌
于國，身立威強，行本淫暴，貴戚不薦善，偪邇不引過，
反聖王之德，而循滅君之行，用此存者，嬰未聞有也。

景公

諫願諸大夫無為禮

景公飲酒酣，曰：今日願與諸大夫為樂，飲請無為禮。
晏子蹴然改容，曰：君之言過矣。群臣固欲君之無禮
也，力多足以勝其長，勇多足以弑君，而禮不使也。禽
獸矣。力為政彊者犯弱，故曰易主。今君去禮，則是禽
獸也。群臣以力為政強者犯弱，而日易主，君將安立
矣。凡人之所以貴于禽獸者，以有禮也。故詩曰：人而
無禮，胡不遘死。禮不可無也。公湏而不聽，少閒，公出。

晏子不起公入不起交舉則先飲公怒色變抑手疾視曰嚮者夫子之教寡人無禮之不可也寡人出入不起交舉則先飲禮也晏子避席再拜稽首而請曰嬰敢與君言而忘之乎臣以致無禮之實也君若欲無禮此是已公曰若是孤之罪也夫子就席寡人聞命矣觴三行遂罷酒蓋是後也飭法修禮以治國政而百姓肅也

諫病酒

景公飲酒醒三日而後發晏子見曰君病酒乎公曰

然晏子曰古之飲酒也足以通氣合好而已矣故男不群樂以妨事女不群樂以妨功男女群樂者周觴五獻過之者誅君身服之故外無怨治內無亂行今一日飲酒而三日寢之國治怒乎外左右亂乎內以刑罰自妨者勸乎為非以賞譽自勸者惰乎為善上離德行民輕賞罰失所以為國矣願君節之也

諫不納弦章之言

景公飲酒七日七夜不止弦章諫曰君欲飲酒七日七夜章願君廢酒也不然章賜死晏子入見公曰章

諫吾曰願君之廢酒也不然章賜死如是而聽之則
臣為制也不聽又愛其死晏子曰幸矣章遇君也今
章遇桀紂者章死久矣于是公遂廢酒

諫不恤天災

景公之時霖雨十有七日公飲酒日夜相繼晏子請
發粟于民三請不見許公命相遽巡國致能歌者旱
子聞之不說遂分家粟于氓致任器于陌徒行見公
曰十有七日矣懷寶鄉有數十飢氓里有數家百姓
老弱凍寒不得短褐飢餓不得糟糠敝撤無走四顧

無告而君不恤日夜飲酒令國致樂不已馬食府粟
狗厭芻豢三保之妾俱足梁肉狗馬保妾不已厚乎
民氓百姓不六薄乎故里窮而無告無樂有上矣饑
餓而無告無樂有君矣嬰奉數之筴以隨百官之吏
民饑餓窮約而無告使上淫湎失本而不恤嬰之罪
大矣再拜稽首請身而去遂走而出公從之兼于塗
而不能逮令趣駕追晏子其家不及粟米盡于民任
器存于陌公駭及之康內公下車從晏子曰寡人有
罪夫子倍棄不援寡人不足以有約也夫子不顧社

稷百姓乎願夫子之幸存寡人寡人請奉齊國之粟
米財貨委之百姓多寡輕重惟夫子之令遂拜于塗
晏子乃返命稟巡氓家有布縷之本而絕食者使有
終月之委絕本之家使有基年之食無委積之氓與
之薪燎使足以畢霖雨令栢巡氓家室不能禦者予
之金巡求氓寡用財乏者死三日而畢後者若不用
令之罪公出舍損肉撤酒馬不食府粟狗不食飪肉
辟拂噉齊酒徒減賜三日吏告畢上貧氓萬七千家
用粟九十七萬鐘薪燎萬三千乘懷寶二千七百家

用金三千公然後就內退食琴瑟不張鍾鼓不陳晏
子請左右與可令歌舞足以留思虞者退之辟拂三
千謝于下陳人待三士侍四出之關外也

諫夜聽新樂

晏子朝杜高望羊待于朝晏子曰君奚故不朝對曰
君夜發不可以晏子曰何故對曰梁丘據高入歌人
虞爰齊音晏子退朝命宗祝修禮而拘虞公聞之而
怒曰何故而拘虞晏子曰以新樂淫君公曰諸侯之
事百官之政寡人願以請子酒醴之味金石之聲願

夫子無與焉夫樂何夫必攻哉對曰夫樂亡而禮從之禮亡而政從之政亡而國從之國衰臣懼君之逆政之行有歌紂作北里幽厲之聲顧夫淫以鄙而偕亡君奚輕變夫故哉公曰不幸有社稷之業不擇言而出之請受命矣

。諫燕賞無功

景公燕賞于國內萬鍾者三千鍾者五令三出而臧計莫之從一作臧計筭之公怒令免臧計令三出而并下士師亦同士師莫之從公不說晏子見公謂晏子曰寡人聞君

國者愛人則能利之惡人則能疏之今寡人愛人不能利惡人不能疏失君道矣晏子曰嬰聞之君正臣從謂之順君僻臣從謂之逆今君賞讒諛之民而令吏必從則是使君失其道臣失其守也先王之立愛以勸善也其立惡以禁暴也昔者三代之興也利于國者愛之害于國者惡之故明所愛而賢良衆明所惡而邪僻滅是以天下治平百姓和集及其衰也行安簡易身安逸樂順于己者愛之逆于己者惡之故明所愛而邪僻繁明所惡而賢良滅離散百姓危覆

社稷君上不度聖王之興而下不觀情君之衰臣懼
君之逆政之行有司不敢爭以覆社稷危宗廟公曰
寡人不知也請從士師之策國內之祿所收者三也
諫信用讒佞

景公信用讒佞賞無功罰不辜晏子諫曰臣聞明君
望聖人而信其教不聞聽讒佞以誅賞今與左右相
悅頌也曰比死者勉為樂乎吾安能為仁而愈黜民
耳矣故內寵之妾迫奪于國外寵之臣矯奪于鄙執
灋之吏並荷百姓民愁苦約病而姦驅尤佞隱情奄

惡蔽諂其上故雖有至聖大賢豈能勝若讒哉是以
忠臣之常有災傷也臣聞古者之士可與得之不可
與失之可與進之不可與退之臣請逃之矣遂鞭而
馬出公使韓子休追之曰狐不仁不能順教以至此
極夫子休國焉而往寡人將從而後晏子遂鞭馬而
返其僕曰嚮之去何速今之返又何速晏子曰非子
之所知也公之言至矣

諫愛嬖妾

翟王子羨臣于景公以重駕公觀之而不悅也嬖人

晏子欲觀之公曰及晏子寢病也居囿中臺上以觀之晏子說之因為之請曰厚祿之公許諾晏子起病而見公公曰翟王子羨之駕寡人甚說之請使之示乎晏子曰駕御之事臣無職焉公曰寡人一樂之是欲祿之以萬鍾其足乎對曰昔衛士東野之駕也公說之晏子不說公曰不說遂不觀今翟王子羨之駕也公不說晏子悅公因說之為請公許之則是婦人為制也且不樂治人而樂治馬不厚祿賢人而厚祿御夫昔者先君桓公之地狹于今修法治廣政教以

霸諸侯今君一諸侯無能親也歲凶年飢道途死者相望也君不此憂恥而惟圖耳目之樂不修先君之功烈而惟飾駕御之伎則公不顧民而忘國甚矣且詩曰載駟載駟君子所誠夫駕八固非制也今又重此其為非制也不滋甚乎且君苟美樂之國必衆為之田獵則不便道行致遠則不可然而用馬數倍此非御下之道也淫于耳目不當民務此聖王之所禁也君苟美樂之諸侯必或效我君無厚德善政以被諸侯而易之以僻此非所以子民彰名致遠親隣國

之道也。且賢良廢滅，孤寡不振，而聽嬖妾以祿御夫，以蓄怨與民為讐之道也。詩曰：哲夫成城，哲婦傾城。今君不免成城之求，而惟傾城之務，國之亡日至矣。君其圖之。公曰：善。遂不復觀，乃罷歸翟王子羨而疏嬖人嬰子。

諫失言

景公有男子五人，所使傳之者皆有車百乘者也。晏子為一焉。公召其傅曰：勉之，將以而所傳為子。及晏子，晏子辭曰：君命其臣據其肩以盡其力，臣敢不勉乎。今有之家，此一國之權臣也。人人以君命命之曰：將以而所傳為子。此離樹別黨，傾國之道也。嬰不敢受命，願君圖之。

諫廢適

淳于人納女于景公，生孺子荼。景公愛之，諸臣謀欲廢公子陽生而立荼。公以告晏子。晏子曰：不可。夫以賤匹貴國之害也。置大立少，亂之本也。夫陽生而長，國人戴之，君其勿易。夫服位有等，故賤不陵貴，立子有禮，故孽不亂宗。願君教荼以禮，而勿陷于邪導之

以義而勿湛于利、長少行其道、宗孽得其倫、夫陽生
敢毋使荼饜梁肉之味、玩金石之聲、而有患乎廢長
立少、不可以教下、尊孽卑宗、不可以利所愛、長少無
等、宗孽無別、是設賊樹姦之本也、君其圖之、古之明
君、非不知繁樂也、以為樂淫則衰、非不知立愛也、以
義失則憂、是故制樂以節、立子以道、若夫恃讒諛以
事君者、不足以責信、今君用讒人之謀、聽亂夫之言、
也、廢長立少、臣恐後人之有因君之過、以資其邪、廢
少而立長、以成其利者、君其圖之、公不聽、景公沒田

氏殺君荼立陽生殺陽生立簡公殺簡公而取齊國

諫誅祝史

景公疥且瘡、暮年不已、召會譴梁丘據、晏子而問焉、
曰、寡人之病、病矣、使史固與祝佗巡山川、宗廟、犧牲
珪璧、莫不備具、數其常多、先君桓公、桓公一則寡人
再病不已、滋甚、予欲殺二子者、以說于上帝、其可乎、
會譴梁丘據曰、可、晏子不對、公曰、晏子何如、晏子曰、
君以祝為有益乎、公曰、然、若以為有益、則詛亦有損
也、君疏輔而遠拂、忠臣擁塞、諫言不出、臣聞之、近臣

嘿遠臣瘖衆口鑠金今自聊耳以東姑尤以西者此
其人民衆矣百姓之咎怨誹謗詛君子上帝者多矣
一國詛兩人祝雖善祝者不能勝也且夫祝直言情
則謗吾君也隱匿過則欺上帝也上帝神則不可欺
上帝不神祝亦無益願君察之也不然刑無罪夏商
所以滅也公曰善解予惑加冠命會譴母治齊國之
政梁丘據母治賓客之事兼屬之乎晏子晏子辭不
得命受相退把政改月而君病悛公曰昔吾先君桓
公以管子為有力邑狐與穀以共宗廟之鮮賜其忠
臣則是多忠臣者子今忠臣也寡人請賜子州欸辭
曰管子有一美嬰不如也有一惡嬰不忍為也其宗
廟之養鮮也終辭而不受

○ 諫怒封人之祝

景公遊于麥丘問其封人曰年幾何矣對曰鄙人之
年八十五矣公曰壽哉子其祝我封人曰使君之年
長于胡宜國家公曰善哉子其復之曰使君之嗣壽
皆若鄙臣之年公曰善哉子其復之封人曰使君無
得罪于民公曰誠有鄙民得罪于君則可安有君得

罪于民者乎。晏子諫曰：君過矣。彼疏者有罪，戚者治之。賤者有罪，貴者治之。君得罪于民，誰將治之？敢問：桀紂君誅乎？民誅乎？公曰：寡人固也。于是賜封人麥丘以為邑。

○ 諫使楚巫明德

楚巫微導裔款以見景公，侍坐三日。景公說之，楚巫曰：公明神主之帝王之君也。公即位有七年矣，事未大濟者，明神未至也。請致五帝以明君德。景公再拜稽首。楚巫曰：請巡國郊以觀帝位。至于牛山而不敢

登，曰：五帝之位在于國南，請齋而後登之。公命百官供齋具于楚巫之所。裔款視事，晏子聞之而見于公，曰：公令楚巫齋牛山乎？公曰：然。致五帝以明寡人之德，神將降福于寡人，其有所濟乎？晏子曰：君之言過矣。古之王者，德厚足以安世，行廣足以容眾，諸侯戴之以為君長，百姓歸之以為父母，是故天地四時和而不失，星辰日月順而不亂，德厚行廣，配天象時，然後為帝王之君，神明之主。古者不慢行而繁祭，不輕身而恃巫。今政亂而行僻，而求五帝之明德也，棄賢

而用巫而求帝王之在身也夫民不為德福不為降
君之帝王不為難乎惜乎君位之高所論之卑也公
曰齋歎以楚巫命寡人曰試嘗見而觀焉寡人見而
說之信其道行其言今夫子譏之請逐楚巫而拘齋
歎晏子曰楚巫不可出公曰何故對曰楚巫出諸侯
必或受之公信之以內不知出以易諸侯于外
不仁請東楚巫而拘齋歎公曰諾故曰送楚巫于東
而拘齋歎于國也

諫祠靈山河伯

齊大旱逾時景公召群臣問曰天不雨久矣民且有
饑色吾使人卜云崇在高山廣水寡人欲少賦歛以
祠靈山可乎群臣莫對晏子進曰不可祠此無益也
夫靈山固以石為身以草木為髮天久不雨髮將焦
身將熱彼獨不欲雨乎祠之無益公曰不然吾欲祠
河伯可乎晏子曰不可河伯以水為國以魚鱉為民
天久不雨泉將下百川竭國將亡民將滅矣彼獨不
欲雨乎祠之何益景公曰今為之柰何晏子曰君誠
避宮殿暴露與靈山河伯共憂其幸而雨乎于是景

公出野居暴露三日天果木雨民盡得種時景公曰
善哉晏子之言可無用乎其維有德

諫貪有國之樂

景公將觀于淄上與晏子間立公喟然歎曰嗚呼使
國可長保而傳于子孫豈不樂哉晏子對曰嬰聞明
王不待立百姓不虛至今君以政亂國以行棄民久
矣而聲欲保之不亦難乎嬰聞之能長保國者能終
善者也諸侯並立能終善者為長烈士並學能終善
者為師昔先君桓公其方任賢而贊德之時亡國恃

以存危國仰以安是以民樂其政而世高其德行遠
征暴勞者不疾驅海內使朝天子而諸侯不怨當是
時盛君之行不能進焉及其卒而衰怠于德而并于
樂身溺于婦侍而謀因豎刁是以民苦其政而世非
其行故身死乎胡宮而不舉蟲出而不收當是時也
桀紂之卒不能惡焉詩曰靡不有初鮮克有終不能
終善者不遂其君今君臨民若寇讎見善若避熱亂
政而危賢必逆于衆肆欲于民而誅雪于下恐及于
身嬰之年老不能待于君使矣行不能單則持節以

沒世耳

○諫悲牛山

景公遊于牛山北臨其國城而流涕曰若何滂沱去此而死乎艾孔梁丘據皆從而泣晏子獨笑于旁公刷涕而顧晏子曰寡人今日遊悲孔與據皆從而寡人而涕泣子之獨笑何也晏子對曰使賢者常守之則太公桓公將常守之矣使勇者常守之則莊公靈公將常守之矣數君者將守之則吾君安得此位而立焉以其迭處之迭去之至于君也而獨為之流涕是不仁也不仁之君見一諂諛之臣見二此臣之所以獨竊笑也

諫遊公阜

景公出遊于公阜北面望睹齊國曰嗚呼使古而無死何如晏子曰昔者上帝以人之沒為善仁者息焉不仁者伏焉若使古而無死丁公太公將有齊國桓襄文武將皆相之君將戴笠衣褐執鉞耨以蹲行畝畝之中孰暇患死公忽然作色不說無幾何而梁丘據御六馬而來公曰是誰也晏子曰據也公曰何如

曰大暑而疾馳甚者馬死薄者馬傷非據孰敢為之
公曰據與我和者夫晏子曰此所謂同也所謂和者
君甘則臣酸君淡則臣鹹今據也甘君亦甘所謂同
也安得為和公忿然作色不悅無幾何日暮公西面
望睹彗星召伯常騫使禳去之晏子曰不可此天教
也日月之氣風雨不時彗星之出天為民之亂見之
故詔之妖祥以戒不敬今君若設文而受諫謁聖賢
人雖不去彗星將自亡今君嗜酒而并于樂政不飾
而寬于小人近讒好優惡文而疏聖賢人何暇在彗
第又將見矣公忿然作色不悅及晏子卒公出背而
立曰嗚呼昔者從夫子而遊公阜夫子一日而三責
我今誰責寡人哉

。諫不卹死些

景公出遊于寒塗睹死齒默然不問晏子諫曰昔吾
先君桓公出遊睹饑者與之食睹疾者與之財使令
不勞力籍歛不費民先君將遊百姓皆悅曰君當幸
遊吾鄉乎今君遊于寒塗據四十里之民殫財不足
以奉歛盡力不能周役民氓饑寒凍餒死齒相望而

君不問失君道矣財屈力竭下無以親上驕泰奢侈
上無以親下上下交離君臣無親此三代之所以衰
也今君行之嬰懼公族之危以為異姓之福也公曰
然為上而忘下厚藉歛而忘民吾罪大矣于是歛死
皆發粟于民據四十里之氓不服政其年公三月不
出遊

諫衣狐白裘

景公之時雨雪三日而不霽公被狐白之裘坐堂側
陛晏子入見立有間公曰惟哉雨雪三日而天不寒

晏子對曰天不寒乎公笑晏子曰嬰聞古之賢君飽
而知人之飢溫而知人之寒逸而知人之勞今君不
知也公曰善寡人聞命矣乃令出裘發粟與飢寒令
所睹于塗者無問其鄉所睹于里者無問其家循國
計數無言其名士既事者兼月疾者兼歲孔子聞之
曰晏子能明其所欲景公能行其所善也

諫異熒惑守虛

景公之時熒惑守于虛基年不去公異之召晏子而
問曰吾聞之人行善者天賞之行不善者天殃之熒

感天罰也。今留虛其孰當之。晏子曰：齊當之。公不悅。曰：天下大國十二，皆曰諸侯，齊獨何以當？晏子曰：虛齊野也，且天之下殃，固于富疆為善，不用出政，不行賢人，使遠諛人反昌，百姓疾怨，自為祈祥，錄錄疆食，進死何傷，是以列舍無次，彗星有芒，熒惑回逆，孽星在旁，有賢不用，安得不亡？公曰：可去乎？對曰：可致者，可去，不可致者，不可去。公曰：寡人為之，若何？對曰：盡去冤聚之獄，使反田矣，散百官之財，施之民矣，振孤寡而敬老，人矣。夫若早者，百惡可去，何獨是孽乎？公

曰：善行之三月而熒惑遷。

諫伐宋

景公舉兵將伐宋，師過泰山，公夢見二丈夫立而怒，其怒甚盛。公恐覺，辟門召占夢者。至，公曰：今夕吾夢二丈夫立而怒，不知其所言，其怒甚盛，吾猶識其狀，識其聲。占夢者曰：師過泰山而不用事故，泰山之神怒也。請趣召祝史祠乎泰山，則可。公曰：諾。明日，晏子朝見，公告之。如占夢之言也。公曰：占夢者之言曰：師過泰山而不用事故，泰山之神怒也。今使人召祝史

祠之晏子俯有間對曰占夢者不識也此非泰山之神是宋之先湯與伊尹也公疑以為泰山神晏子曰公疑之則嬰請言湯伊尹之狀也湯質皙而長顏鬣鬣兌上豐下倨身而揚聲公曰然是已伊尹黑而短蓬而鬣豐上兌下倭身而下聲公曰然是已今若何晏子曰夫湯太甲武丁祖乙天下之盛君也不宜無後今惟宋耳而公伐之故湯伊尹怒請散師以平宋景公不用終伐宋晏子諫曰伐無罪之國以怒明神不易行以續蓄進師以近過非嬰所知也師若果進軍必有殃軍進再舍鼓毀將殪公乃辭乎晏子散師不果伐宋

諫畋荒

景公畋于署梁十有八日而不返晏子自國往見公比至衣冠不正不革衣冠望游而馳公望見晏子下而急帶曰夫子何為遽國家無有故乎晏子對曰不亦急也雖然嬰願有復也國人皆以君為安野而不安國好獸而惡民毋乃不可乎公曰何哉吾為夫婦獄訟之不正乎則泰士子牛存矣為社稷宗廟之不

享乎則泰祝子游存矣為諸侯賓客莫之應乎則行人子羽存矣為田野之不辟倉庫之不實則申田存焉為國家之有餘不足聘乎則吾子存矣寡人之有五子猶心之有四支心有四支故心得佚焉今寡人有五子故寡人得佚焉豈不可哉晏子對曰嬰聞之與君言異若乃心之有四支而心得佚焉可得令四支無心十有八日不亦久乎公于是罷政而歸

○諫誅野人

景公射鳥野人駭之公怒令吏誅之晏子曰野人不知也臣聞賞無功謂之亂罪不知謂之虐兩者先王之禁也以飛鳥犯先王之禁不可今君不明先王之制而無仁義之心是以從欲而輕誅夫鳥獸固人之養也野人駭之不亦宜乎公曰善自今已後弛鳥獸之禁無以苛民也

○諫誅圉人

景公使圉人養所愛馬暴死公怒令人操刀解養馬者是時晏子侍前左右執刀而進晏子止而問于公曰堯舜支解人從何軀始公矍然曰從寡人始遂不

支解公曰以屬獄晏子曰此不知其罪而死臣為君

數之使知其罪然後致之獄公曰可晏子數之曰或

景公有馬其圉人殺之公怒援將自擊之晏子曰此

不其罪而死臣請為君數之令知其罪而殺之公曰

臨之曰云云爾罪有三公使汝養馬而殺之當死

罪一也又殺公之所最善馬當死罪二也使公以一

馬之故而殺人百姓聞之必怨吾君諸侯聞之必輕

吾國汝殺公馬使怨積于百姓兵弱于隣國汝當死

罪三也今以屬獄公喟然嘆曰夫子釋之夫子釋之

勿傷吾仁也

諫藉重獄多

以後諫下

選六段

景公藉重而獄多拘者滿圉怨者滿朝晏子諫公不

聽公謂晏子曰夫獄國之重官也願託之夫子晏子

對曰君將使嬰勅其功乎則嬰有壹妄能書足以治

之矣君將使嬰勅其意乎夫民無欲殘其家室之生

以奉暴上之僻者則君使吏比而焚之而已矣景公

不悅曰勅其功則使一妄勅其意則比焚如是夫子

無所謂能治國乎晏子曰嬰聞與君異今夫胡貉戎

狄之畜狗也多者十有餘寡者五六然不相害傷今

東鷄豚妄投之其折骨決皮可立得也且夫上正其
治下審其論則貴賤不相踰越今君舉千鍾爵祿而
妄投之于左右左右爭之甚于胡狗而公不知也寸
之管無當天下一不能足之以粟今齊國丈夫畊女子
織夜以接日不足以奉上而君側皆彫文刻鏤之觀
此無當之管也而君終不知五尺童子操寸之煙天
下不能足以薪今君之左右皆操煙之徒而君終不
知鍾鼓成肆于戚成舞雖禹不能禁民之觀且夫飾
民之欲而嚴其聽禁其心聖人所難也而况奪其財
而飢之勞其力而疲常致其苦而嚴聽其獄痛誅其
罪非嬰所知也

諫殺犯槐

景公有所愛槐令吏謹守之植木縣之下令曰犯槐
者刑傷之者死有不聞令醉而犯之者公聞之曰是
先犯我令使吏拘之且加罪焉其子往辭晏子之家
託曰負廓之民賤妾請有道于相國不勝其欲願得
克數乎下陳晏子聞之笑曰嬰其淫于色乎何為老
而見犇雖然是必有故令內之女子入門晏子望見

之曰恠哉有深憂進而問焉曰所憂何也對曰君樹
槐縣令犯之者刑傷之者死妾父不仁不聞令醉而
犯之吏將加罪焉妾聞之明君蒞國立政不損祿不
益刑又不以私恚害公法不為禽獸傷人民不為草
木傷禽獸不為野草傷禾苗吾君欲以樹木之故殺
妾父孤妾身此令行于民而法于國矣雖然妾聞之
勇士不以衆彊凌孤獨明惠之君不拂是以行其所
欲此譬之猶自治魚鱉者也去其腥臊者而已昧墨
與人比居庾肆而教人危坐今君出令于民苟可法

于國而善益于後世則父死亦當矣妾為之收亦空
矣甚乎今之令不然以樹木之故罪法妾父妾恐其
傷察吏之法而害明君之義也隣國聞之皆謂吾君
愛對而賤人其可乎願相國察妾言以裁犯禁者晏
子曰甚矣吾將為子言之于若使人送之歸明日蚤
朝而復於公曰嬰聞之窮民財力以供嗜欲謂之暴
崇玩好威嚴擬乎君謂之逆刑殺不辜謂之賊此三
者守國之大殃今君窮民財力以羨饅食之具繁鍾
鼓之樂極宮室之觀行暴之大者崇玩好縣愛槐之

令載過者馳步過者趨威嚴擬乎君逆之明者也犯
槐者刑傷槐者死殺不稱賊民之深者君享國德行
未見于衆而三辟著于國嬰恐其不可以蒞國子民
也公曰微大夫教寡人幾有大罪以累社稷今子大
夫教之社稷之福寡人受命矣晏子出公令趣罷之
後拔置縣之木廢傷槐之法出犯槐之囚

諫囚斬竹

景公對竹令吏謹守之公出過之有斬竹者焉公以
車逐得而拘之將加罪焉晏子入見曰公亦聞吾先

君丁公乎公曰何如晏子曰丁公伐曲沃勝之此其
財出其民公曰自蒞之有與死人以出者公恠之令
吏視之則其中金與玉焉吏請殺其人收其金玉公
曰以兵降城以衆圍財不仁且吾聞之人君者寬惠
慈衆不身傳誅令捨之公曰善晏子退公令出斬竹
之囚

諫搏治之兵

景公令兵搏治當臈冰月之間而寒民多凍餒而功
不成公怒曰為我殺兵二人晏子曰諾少為聞晏子

曰昔者先君莊公之伐于晉也其役殺兵四人今令而殺兵二人是殺師之半也公曰諾是寡人之過也令止之

諫起大臺之役

晏子使于魯比其返也景公使國人起大臺之役歲寒不已凍餒之者鄉有焉國人望晏子晏子至已復事公迺坐飲酒樂晏子曰君若賜臣臣請歌之歌曰庶民之言曰凍水洗我若之何太上靡散我若之何歌終喟然歎而流涕公就止之曰夫子曷為至此殆

為大臺之役夫寡人將速罷之晏子再拜出而不言遂如大臺執朴鞭其不務者曰吾細人也皆有蓋廬以避燥濕君為一臺而不速成何為國人皆曰晏子助天為虐晏子歸未至而君出令趣罷役車馳而人趨仲尼聞之喟然嘆曰古之善為人臣者聲名歸之君禍災歸之身入則切磋其君之不善出則交譽其君之德義是以雖事情君能使垂衣裳朝諸侯不敢伐其功當此道者其晏子是耶

諫為長廩

景公為長康康舍也將欲美之有風雨作公與晏子入坐飲酒致堂上之樂酒酣晏子作歌曰穗乎不得穫秋風至兮殫零落風雨之弗殺也太上之靡散也歌終頤而流涕張躬而舞公就晏子而心之曰今日夫子為賜而誠于寡人是寡人之罪遂廢酒罷役不果成長康

○諫為鄒之長塗

景公築路寢之臺三年未息又為長康之役二年未息又為鄒之長塗晏子諫曰百姓之力勤矣公不息

乎公曰塗將成矣請成而息之對曰明君不屈民財者不得其利不窮民力者不得其樂昔者楚靈王作傾宮三年未息也又為章華之臺五年又不息也乾溪之役八年百姓之力不足而息也靈王死于乾溪而民不與君歸今君不遵明君之義而循靈王之跡嬰懼君有暴民之行而不睹長康之樂也不若息之公曰善非夫子者寡人不知得罪於百姓深也于是令勿委壞餘財勿收斬板而去之

諫游獵興役

景公春夏游獵又起大臺之後晏子諫曰春夏起役
且遊獵奪民農時國家空虛不可景公曰吾聞相賢
者國治臣忠者主逸吾年無幾矣欲遂吾所樂卒吾
所好子其息矣晏子曰昔文王不敢盤游于田故國
昌而民安楚靈王不廢乾溪之役起章華之臺而民
叛之今君不單將危社稷而為諸侯笑臣聞忠不避
死諫不違罪君不聽臣臣將遊矣景公曰唯、將弛
罷之未幾朝韋罔解役而歸

諫坐地

景公獵休坐地而食晏子後至左右滅葭而席公不
說曰寡人不席而坐地二三子莫席而子獨寡草而
坐之何也晏子對曰臣聞介冑坐陣不席獄訟不席
尸坐堂上不席三者皆憂也故不敢以憂侍坐公曰
諾令人下席曰大夫皆席寡人亦席矣

諫以蛇虎為不祥

景公出獵上山見虎下澤見蛇歸召晏子而問之曰
今日寡人出獵上山則見虎下澤則見蛇殆所謂不
祥也晏子對曰國有三不祥是不與焉夫有賢而不

知一不祥知而不用二不祥用而不任三不祥也所謂不祥乃若此者今上山見虎庖之室也下澤見蛇蛇之穴也如虎之室如蛇之穴而見之曷為不祥也

諫欲為鐘

景公為臺臺成又欲為鐘晏子諫曰君國者不樂民之哀君不勝欲既築臺矣今復為鐘是重斂于民民必哀矣夫斂民之哀而以為樂不祥非所以君國者公乃止

諫以泰呂為燕

景公泰呂成謂晏子曰吾欲與夫子燕對曰未祀先君而以燕非禮也公曰何以禮為對曰夫禮者民之紀紀亂則民失亂紀失民危道也公曰善乃以祀焉

諫飾履以金玉

景公為履黃金之綦飾以銀連以珠良玉之胸其長尺冰月服之以聽朝晏子朝公迎之履重僅能舉足問曰夫寒乎晏子曰君奚問天之寒也古聖人製衣服也冬輕而暖夏輕而清今君之履冰月服之是重寒也履重不節是過任也失生之情矣故魯工不知

寒濕之節、輕重之量、以害正生、其罪一也。作服不常、以笑諸侯、其罪二也。用財無工、以怨百姓、其罪三也。請拘而使吏度之、公苦請釋之。晏子曰：不可。嬰聞之：苦身為善者、其賞厚；苦身為非者、其罪重。公不對。晏子出、令吏拘魯工、令人送之境。吏不得入、公撤履不復服也。

○諫欲以居服而致諸侯

景公問晏子曰：吾欲服聖王之服、居聖王之室、如此則諸侯其至乎？晏子對曰：法其節儉則可、法其服居其室無益也。三王不同服、而王非以服致諸侯也。誠于愛民、果于行善、天下懷其德而歸其義。若其衣服節儉而衆悅也、夫冠足以修敬、不務其飾、衣足以掩形禦寒、不務其美、衣不務于隅眦之削、冠無觚羸之理、身服不雜綵、首服不鏤刻、且古者嘗有紩衣、孿領而王天下者、其義好生而惡殺、節上而羨下、天下不朝其服而共歸其義。古者嘗有處槽巢窟穴而不惡、予而不取、天下不朝其室而共歸其仁。及三代作服、為益敬也、首服足以修敬而不重也、身服足以行潔

而不害于動作服之輕重便于身用財之費順于民
其不為櫓巢者以避風也其不為穴者以避濕也是
故明堂之制下之潤濕不能及也上之寒暑不能入
也土事不文木事不鏤示民之節也及其棄也衣服
之侈過足以敬宮室之美過避潤濕用力甚多用財
甚費與民為讐今君欲服聖王之服不法其制法其
節儉也則雖未成治庶其有益也今君窮臺榭之高
極汙池之深而不止務于刻鏤之巧文章之觀而不
厭則亦與民而讐矣若臣之慮恐國之危而公不平

也公乃願致諸侯不亦難乎公之言過矣

諫矜冠裳遊處之貴

景公為西曲潢其深滅軌高三仞橫木龍蛇立木鳥
獸公衣黼黻之衣素繡之裳一衣而五綵具焉帶球
玉而冠且被髮亂首南面而立傲然晏子見公曰昔
仲父之霸何如晏子對曰臣聞之維翟人與龍蛇比今君
之霸何如晏子對曰臣聞之維翟人與龍蛇比今君
橫木龍蛇立木鳥獸亦室一就矣何暇在霸哉且公
伐宮室之美矜衣服之麗一衣而五彩具焉帶球玉

而亂首被髮亦室一容矣萬乘之君而一心于邪君之魂魄亡矣以誰與圖霸哉公下堂就晏子曰梁丘據齋欸以室之成告寡人是以竊覲此服與據為笑又使夫子及寡人請改室易服而敬聽命其可乎晏子曰夫二子營君以邪公安得知道哉且伐木不自其根則蘗又生也公何不去二子者毋使耳目淫焉

諫巨冠長衣以聽朝

景公為巨冠長衣以聽朝疾視矜立日晏不罷晏子進曰聖人之服中悅而不駟可以導衆其動作悅順而不逆可以奉生是以下皆法其服而民爭學其容今君之服駟華不可以導衆民疾視矜立不可以奉生日晏矣君不若脫服就燕公曰寡人受命退朝遂去衣冠不復服

諫朝居嚴

晏子朝復於景公曰朝居嚴乎公曰嚴居朝則害曷於治國家哉晏子對曰朝居嚴則下無言下無言則上無聞矣下無言則吾謂之瘖上無聞則吾謂之聾聾瘖非害國家而如何也且合升豉之微以滿倉廩

合疏縷之緜以成綈幕太山之高非一石也累卑然後高夫下者非用一士之言也固有受而不用惡有拒而不受者哉

諫登路寢臺

景公登路寢之臺不能終而息乎陛忽然而作色不悅曰孰為高臺病人之甚也晏子曰君欲節于身而勿高使人高之而勿罪也今高從之以罪卑亦從以罪敢問使人如此可乎古者之為宮室也足爭以便生不以為奢侈也故節于身謂于民及夏之衰也其

王桀背棄德行為璿室玉門殷之衰也其王紂作為傾宮靈臺卑狹者有罪高大者有賞是以身及焉今君高亦_有罪卑亦_有罪甚于夏殷之王民力殫之矣而不免於罪嬰恐國之流失而公不得亨也公曰善寡人自知誠費財勞民以為無功又從而怨之是寡人之罪也非夫子之教豈得守社稷哉遂下再拜不果登臺

諫望國而歡

景公與晏子登寢而望國公愀然而歡曰使後嗣世

世有此豈不可哉晏子曰臣聞明君必務正其治以
事利民然後子孫享之詩云武王豈不事貽厥孫謀
以燕翼子今君處佚怠逆政害民有日矣而猶出若
言不亦甚乎公曰然則後世孰將把齊國對曰服牛
死夫婦笑非骨肉之親也為其利之大也欲知把齊
國者則其利之者耶公曰然何以易對曰移之以善
政今公之牛馬老于欄牢不勝服也車蠹于巨戶不
勝乘也衣裘襦袴朽弊于箴不勝衣也醢醢腐不勝
沽也酒醴酸不勝飲也府粟罄而不勝食又厚藉歛
於百姓而不以分餒民夫箴財而不用凶也財苟失
守下其報環至其次昧財之失守委而不以分人者
百姓必進自分也故君人者與其請于人不如請于
已也

諫禁逢於何合葬

景公成路寢之臺逢於何遭喪遇晏子于塗再拜乎
馬前晏子下車挹之曰子何以命嬰也對曰於何之
母死兆在路寢之臺牖下願請命合骨晏子曰嘻難
哉雖然嬰將為子復之適為不得子將若何對曰夫

君子則有以如我者儕小人吾將左手擁格右手拥
心立餓枯槁而死以告四方之士曰於何不能塋其
母者也晏子曰諾遂入見公曰有逢於何者母死兆
在路寢當如之何願請合骨公作色不悅曰古之及
今子亦嘗聞請塋人主之宮者乎晏子對曰古之人
君其室宮節不侵生民之居臺榭儉不殘死人之墓
故未嘗聞諸請塋人主之宮者也今君侈為宮室奪
人之居廣為臺榭殘人之墓是生者愁憂不得安處
死者離易不得合骨豐樂侈遊兼傲生死非人君之

行也遂欲滿求不顧細民非存之道且嬰聞之生者
不得安命之曰蓄憂死者不得塋命之曰蓄哀蓄憂
者怨蓄哀者危名不如許之公曰諾晏子出梁丘據
曰自昔及今未嘗聞求塋公宮者也若何許之公曰
削人之居殘人之墓凌人之喪而禁其塋是于生者無
施于死者無禮詩云穀則異室死則同穴吾敢不許
乎逢於何遂塋其母路寢之牖下解衰去絰布衣滕
履玄冠芘武踊而不哭躡而不拜已乃涕洟而去

諫不飲嬰子

景公之嬖妾嬰子死公守之三日不食膚著于席不去左右以復而君無聽焉嬰子入復曰有術客與醫俱言曰聞嬰子病死願請治之公喜遽起曰病猶可為乎晏子曰客之道也以為良醫也請嘗試之君請屏潔沐浴飲食間病者之宮彼亦將有鬼神之事焉公曰諾屏而沐浴晏子令棺人入歛已歛而復曰醫不能治病已歛矣不敢不以聞公作色不悅曰夫子以醫命寡人而不使視將歛而不以聞吾之為君名而已矣晏子曰君獨不知死者之不可以生耶嬰聞

之君正臣從謂之順君僻臣從謂之逆今君不道順而行僻從邪者邇導害者遠讒諛萌通而賢良廢滅是以諂諛繁於間邪行交於國也昔吾先君桓公用管仲而霸嬖乎豎刁而滅今君薄于賢人之禮而厚嬖妾之哀且古聖王畜私不傷行殮死不失愛送死不失哀行蕩則溺已愛失則傷生失則害性是故聖王節之也即畢殮不留生事棺槨衣衾不以害生養哭泣處哀不以害生道今朽尸以留生廣愛以傷行修哀以害性君之失矣故諸侯之賓客慙入吾國本

朝之臣慙守其職崇君之行不可以導民從君之欲
不可以持國且嬰聞之守而不殮謂之僂尸臭而不
收謂之陳齒反明王之性行百姓之誹而內嬖妾于
僂齒此之為不可公曰寡人不識請因夫子而為之
晏子復國之士大夫諸侯四隣賓客皆在外君其哭
而節之仲尼聞之曰星之昭々不若月之暉々小事
之成不若大事之廢君子之非賢于小人之是也其
晏子之謂歟

諫厚葬梁丘據

梁丘據死景公召晏子而告之曰據忠且愛我我欲
豐厚其葬高大其壟晏子曰敢問據之忠與愛於君
者可得聞乎公曰吾有喜于玩好有司未能我具也
則據以其所有共我是以知其忠也每有風雨暮夜
求必存吾是以知其愛也晏子曰嬰對則為罪不對
則無以事君敢不對乎嬰聞之臣專其君謂之不忠
子專其父謂之不孝妻專其夫謂之不嫉事君之道
導親于父兄有禮于羣臣有惠于百姓有信於諸侯
謂之忠為子之道以鍾愛其兄弟施行于諸父慈惠

於衆子誠信于朋友謂之孝為妻之道使其衆妾皆得歡忻于其夫謂之不嫉令四封之民皆君之臣也而維據盡力以愛君

諫以人禮葬狗

景公走狗死公令外共之棺內給之祭晏子聞之諫公曰亦細物也特以與左右為笑耳晏子曰君過矣夫厚藉歛不以反民棄貨財而笑左右傲細民之憂而崇左右之笑則國亦無望已且夫孤老凍餒而死狗有祭鰥寡不恤而死狗有棺行辟若此百姓聞之

必怨吾君諸侯聞之必輕吾國怨聚于百姓而權輕於諸侯而乃以為細物君其圖之公曰善趣庖治狗以會朝屬

諫養勇士

公孫接田開疆古冶子事景公以勇力搏虎聞晏子過而趨三子者不起晏子入見公曰臣聞明君之蓄勇力之士也上有君臣之義下有長率之倫內可以禁暴外可以威敵上利其功下服其勇故尊其位重其祿今君之蓄勇士之力也上無君臣之義下無長

率之倫內不以禁暴外不可威敵此危國之器也不
若去之公曰三子者搏之恐不得刺之恐不中也晏
子曰此皆力攻勅敵之人也無長幼之禮因請公使
人少餽之二桃曰三子何不計功而食桃公孫接仰
天而歎曰晏子智人也夫使公之計吾功者不受桃
是無勇也士衆而桃寡何不計功而食桃矣接一搏
猶而再搏乳虎若接之功可以食桃而無與人同矣
援桃而起田開疆曰吾伏兵而卻三軍者再若開疆
之功亦可以食桃而無與人同矣援桃而起古冶子

曰吾嘗從君濟于河鼃御左騃以入砥柱之流當是
時也治少不能游潛行逆流百步順流九里得鼃而
殺之左操騃尾右挈鼃頭鶴躍而出津人皆曰河伯
也若治視之則大鼃之首若治之功亦可以食桃而
無與人同矣二子何不反桃抽劔而起公孫接田開
疆曰吾勇不子若功不子逮取桃不讓是貪也然而
不死無勇也皆反其桃挈領而死古冶子曰二子死
之治獨生之不仁取人以言而夸其聲不義恨乎所
行不死無勇雖然二子同桃而節治專桃而宜亦反

其桃挈領而死使者復曰已死矣公殮之以服葬之
以士禮焉

○諫思勇力士

景公登射晏子修禮而侍公曰選射之禮寡人厭之
矣吾欲得夫勇力士與之圖國晏子對曰君子無禮
是庶人也庶人無禮是禽獸也夫勇多則弑其君力
多則殺其長然而不敢者維禮之謂也禮者所以御
民也轡者所以御馬也無禮而能治國家者嬰未之
聞也景公曰善迺飾更席以為上客終日問禮

終

